



N/r Beriz Belkić, predsjedavajući Doma

Predmet : Prijedlog Zakona o dopuni Zakona o službenom glasilu Bosne i Hercegovine

Na osnovu člana 99. Poslovnika Predstavničkog doma Parlamentarne skupštine BiH ("Službeni glasnik BiH" broj 33/06, 41/06, 81/06, 91/06 i 91/07) kao ovlašteni predlagač, dostavljam **Prijedlog Zakona o dopuni Zakona o službenom glasilu Bosne i Hercegovine** radi razmatranja i usvajanja u Parlamentarnoj skupštini Bosne i Hercegovine.

Predlažem da se procedura razmatranja i usvajanja prijedloga ovoga zakona provede po skraćenom zakonodavnom postupku u skladu sa **članom 126. Poslovnika** Predstavničkog doma Parlamentarne skupštine Bosne i Hercegovine.

U prilogu dostavljam tekst prijedloga zakona s obrazloženjem, kao i elektronsku verziju prijedloga zakona (disketa).

S poštovanjem,

Sarajevo; __. Januar 2009.godine

POSLANIK
Adem Huskić

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na ___ sjednici Predstavničkog doma, održanoj _____2009.godine, i na ___ sjednici Doma naroda, održanoj _____2009. godine, usvojila je

**ZAKON O DOPUNI
ZAKONA O SLUŽBENOM GLASILU BOSNE I HERCEGOVINE**

Član 1.

U Zakonu o službenom glasilu Bosne i Hercegovine ("Službeni. glasnik BiH" broj 1/97 i 9/04) iza člana 5. dodaje se član 5a koji glasi:

"Član 5a.

Zakoni objavljeni u Službenom glasilu Bosne i Hercegovine, objavljuju se i na internetu i besplatno su dostupni javnosti."

Član 2.

Ovaj zakon stupa na snagu osmog dana od dana objavljivanja u "Službenom glasniku BiH".

*PS BiH broj: _____/09.
Sarajevo, _____2009. godine*

Predsjedavajući
Predstavničkog doma
Parlamentarne skupštine BiH
Beriz Belkić

Predsjedavajući
Doma naroda
Parlamentarne skupštine BiH
Mladen Ivanić

OBRAZLOŽENJE

I. USTAVNOPRAVNI OSNOV

Ustavni osnov za donošenje ovog zakona je nesporan, jer se radi o maloju dopuni postojećeg Zakona o službenom glasilu Bosne i Hercegovine, a sadržan je u članu III/3 h) Ustava BiH (*Odluke Parlamentarne skupštine neće stupiti na snagu prije objavljivanja*) i člana IV/4. a) Ustava BiH (*Donošenje zakona potrebnih za provođenje odluka Predsjedništva ili za izvršavanje nadležnosti Skupštine po Ustavu*), te članu II/1 (*Bosna i Hercegovina i oba entiteta će osigurati najviši nivo međunarodno priznatih ljudskih prava i osnovnih sloboda.....*)

Pored ustavnog osnova, Zakon o slobodi pristupa informacijama u Bosni i Hercegovini ("Službeni glasnik BiH" broj: 28/00 i 45/04) kao *lex generalis* je u članu 1. utvrdio da "informacije pod kontrolom javnog organa predstavljaju javno dobro" i u članu 4. propisuje da: "svako fizičko i pravno lice ima pravo pristupa informacijama koje su pod kontrolom javnog organa, a svaki javni organ ima odgovarajuću obavezu da objavi takve informacije"

II RAZLOZI ZA DONOŠENJE

Iako je Vijeće ministara BiH preuzelo prava osnivača Javnog preduzeća NIO Službeni list BiH, ništa nije preuzelo da bi uredilo pravni status, rukovođenje i organizaciju distributera javnog glasila Bosne i Hercegovine. Stavljanjem na internet svih zakona koji se objavljuju u "Službenom glasniku BiH" omogućilo bi se velikom i neograničenom broju građana Bosne i Hercegovine i javnosti uopšte nesmetan pristup donesenim i objavljenim zakonima, a time, između ostalog, i bolja primjena svih propisa, a kvalitetno informisanje je preduslov za razvoj demokratije i ljudskih prava i osnovno oružje u borbi protiv korupcije.

III. OBRAZLOŽENJE PONUĐENIH RJEŠENJA

Ponuđenim članom 5a. se nameće obaveza da se zakoni objavljeni u Službenom glasniku BiH objavljuju na internetu. Na taj način se ostvaruje pravo građana na informisanje i u uslovima sve raširenijeg korištenja interneta stvaraju uslovi i na povećanje primjene zakona.

IV. USAGLAŠENOST SA ZAKONODAVSTVOM EU

Ponuđeno rješenje u zakonu odgovara standardima Evropske unije i standardima zemalja članica, jer su svi zakoni i propisi EU i zemalja članica dostupni javnosti putem interneta.

V. FINANSIJSKA SREDSTVA

Za provođenje ovog zakona nije potrebno je osigurati dodatna finansijska sredstva u Budžetu institucija Bosne i Hercegovine.